

Formacion Social

Comandante di Marinierskazerne satisfecho cu e proyecto y di por mira su ehecucion

ORANJESTAD -- Siman pasa e prome grupo di hoben cu a cuminsa cu e trayecto Formacion Social a haya nan certificado, despues di a termina henter e proceso exitosamente. Durante un ceremonia chikito den Fort Zoutman na unda entre otro Comandante di Marinierskazerne Hofma a hiba palabra, e hobennan a ricibi nan certificado for di man di Prome Minister Mike Eman y Jessy Ras, kende ta guia e proyecto aki. Un proposicion di ley cu aña pasa a keda acepta unanimamente den Parlamento di Aruba.

Edwin Hofma, Comandante di Marinierskazerne a bisa e publico presente di tin aprecio pa e interes cu tin pa e proyecto Formacion Social. "Un proyecto inicia dor di gobierno di Aruba y desaroya pa un comision cu participacion di diferente instancia". Hofma tabatin hopi palabra di aprecio pa e instructornan di Arumil cu a siña e hobennan un cantidad di



Edwin Hofma, Comandante di Marinierskazerne.

habilidad, pero principalmente balornan, manera entre otro cu 'afspraak ta afspraak', tempo ta oro, 'together we achieve

more'.

El a duna e hobennan un consejo valioso. "Haci uzo di e oportunidad brinda na boso".

Tambe el a felicita nan y desea nan tur cos bon den futuro. Den un entrevista despues cu Comandante Hofma el a enfatisa di ta un homber satisfecho. "Esaki ta e finalisacion di un proyecto di cua nos a traha riba su preparacion y su ehecucion". Hofma ta corda con den cuminsamento mester a surpasa tur sorto di bareranan huridico. Defensa di Hulanda

a pone como condicion cu tur cos mester ta huridicamente bon hinca den otro prome cu por a start cu e proyecto. Ora cu esaki tabata cla, cosnan a cuminsa cana lihe.

Hofma ta conta cu tabatin bon interaccion entre e hobennan di Formacion Social y e militarnan.

"Dor di e idioma Papiamentu e instruccionnan diario tabata bin di e militarnan di Arumil. Awor aki tin un otro grupo y nos militarnan de bes en cuando ta core hunto cu nan. Wak si nan ta hisa e bandera den e forma corecto. Bo ta mira con e hobennan ta cambia den un forma positivo y esey ta masha inspirativo y motivador".

Capitan Werleman den su discurso a ilustra cu entre e hobennan cu a caba nan trayecto di Formacion Social tin di nan cu ta apto di por cuminsa un carera militar. Hofma "Esaki ta berdad, pero nan mester tene cuenta cu si nan drenta Arumil cu esaki ta temporal, te cu 30 aña. P'esey mi ta conseha nan pa caba nan scol, drenta despues den Arumil na unda nan ta siña mas ainda pa despues cu nan diploma di siguridad cu nan a haya durante e trayecto aki, nan tin hopi mas oportunidad riba mercado laboral". □